



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
**PANELI ZGJEDHOR PËR ANKESA DHE PARASHTRESA**  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

**Anr.301/2025**

**PANELI ZGJEDHOR PËR ANKESA DHE PARASHTRESA (PZAP)**, në panelin e përbërë nga gjyqtarët: Arsim Hamzaj kryesues, Kymete Kicaj dhe Skender Çoçaj anëtarë, duke vendosur përkritazi me ankesat e subjektit politik Lëvizja Vetëvendosje (LVV) me seli në Prishtinë, paraqitur kundër subjektit politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 04.02.2025, merr këtë:

#### **V E N D I M**

I. PRANOHEN të bazuara ankesat e subjektit politik Lëvizja Vetëvendosje (LVV), me seli në Prishtinë, Anr.301/2025, të datës 01.02.2025, Anr.308, Anr.309, Anr.310 Anr.315/2025, Anr.321/2025, të datës 02.02.2025.

II. Subjektit Politik Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjobë në lartësi prej 16,000.00€ (gjashtëmbëdhjetë mijë euro).

III. Detyrohet Subjektit Politik Partia Demokratike e Kosovës (PDK), që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

#### **A r s y e t i m**

Me datën 01.02.2025 PZAP-i, ka pranuar ankesën e identifikuar me numër Anr.301/2025,, dhe me datën 02.02.2025 ankesat Anr.308, Anr.309, Anr.310 Anr.315/2025, dhe Anr.317/2025, nga subjekti politik Lëvizja Vetëvendosje (LVV), me seli në Prishtinë, kundër subjektit politik Partia Demokratike e Kosovës (PDK).

-Në ankesë Anr.301/2025 pretendohet se me 1 shkurt 2025, mbështetësi i subjektit politik Partia Demokratike e Kosovës - PDK, Rasim Brahim Rexhepi, ka postuar në Ilogarinë e tij në rrjetin social Facebook një tekst i cili përmban gjuhë urrejtëse dhe ofenduese si dhe bie në kundërshtim me dispozitat ligjore të Ligjit Nr.08/L-228 për Zgjedhjet e Përgjithshme në Kosovë. Teksti i plotë dhe origjinal në Ilogarinë personale të Rasim Brahim Rexhepi në rrjetin social Facebook, është si në vijim: "*Mos të harrojm se kjo qeveri në krye më Albin*

*Serbin e ky pushtet na pat detyru me dal ne rrug me ja ndalu veprimet idoteske qe i bente kunder vlerave te luftes, e vjedhjeve masive qe i bente kur erdh ne pushtet, e per kte arsye kena me e rrexu BASHKOHUNI TE GJITHË PER NDER TE ATDHEUT!"*

PROVË: Postimi në rrjetin social

-Në ankesën 308/2025, pretendohet se me 2 Shkurt 2025, aktivistë të Lëvizjes VETËVENDOSJE kanë identifikuar mbështetësin e PDK-së Nehat Bunjaku i cili në kuadër të postimeve të shumta të tij ofenduese dhe nxitëse për urrejtje kundrejt LVV-së dhe Kryeministrit Albin Kurti, në llogarinë e tij në facebook poashtu ka shpërndarë fotografinë dhe videon me tekstin mbi fotografi/video "*Herio i Albin Kurti dhe Vetevendosjes Oliver Ivanovi*", me një fotografi përçmuese (*Kurti dhe Ivanovic të përçafuar*), duke nxitur urrejtje dhe duke fyer e ofenduar mes tjerash.

Përmes këtij veprimi mbështetësit/ simpatizantët e partisë politike PDK dhe subjekti politik PDK kanë shkelur rëndë dispozitat e nenit 34. paragrafi 1, pika 1.11 të Ligjit për Zgjedhjet e Përgjithshme në Kosovë. Se Nehat Bunjaku është mbështetës dhe simpatizant i PDK-së, kjo mund të vërehet në provat bashkëngjitur. PROVË: Fotografi dhe link, mes tjerash, ku dëshmohet përdorimi i gjuhës që nxitë, provokon akt të dhunës apo urrejtjes, në kundërshtim me LZP-në, si dhe në të cilën faktehet si mbështetës i PDK-së: [https://www.facebook.com/permalink.php?story\\_fbid=2556936647829683&id=100005401188326](https://www.facebook.com/permalink.php?story_fbid=2556936647829683&id=100005401188326)

-Në ankesën Anr.309/2025 pretendohet se më 1 Shkurt 2025, Qendra e Lëvizjes VETËVENDOSJE në Skenderaj ka identifikuar mbështetësin e PDK-së Demë Berisha i cili përmes fotografisë dhe tekstit të shpërndarë në llogarinë e tij në facebook, ka ofenduar rëndë, ka nxitur gjuhë të urrejtjes ndaj Kryeministrit Kurti, njëkohësiht kandidat i LVV për deputet dhe Kryeministër. Në tekstin e shpërndarë, mbështetësi i PDK shkruan "*O servila e Ilaskuca te vegles serbe Kurtoviqit, Sado që paguheni shtrenjtë, perderisa shiteni, nuk keni asnjë vlere.*" Provë: Fotografi dhe link, mes tjerash, ku dëshmohet përdorimi i gjuhës që nxit, provokon akt të dhunës apo urrejtjes, në kundërshtim me LZP-në: <https://www.facebook.com/watch/?v=9632869613390764>

-Në ankesën Anr.310/2025, pretendohet se me datë 2 Shkurt 2025/ Qendra e Lëvizjes VETËVENDOSJE në Skenderaj ka identifikuar mbështetësin e PDK-së Enver Rubovci i cili në kuadër të posteve të shumta të tij ofenduese dhe nxitëse për urrejtje kundrejt LVV-së/ në llogarinë e tij në facebook poashtu ka shpërndarë fotografinë dhe videon me tekstin mbi një fotografi/video "*Tradhtia dhe Hajnia kanë Emër.. VETËVENDOSJE bashkë me Albin Kurtin*". Video e tillë poashtu ka takstin "*LVV-ja është strofull e bashkëpunëtorëve të Serbisë!*" Se Enver Rubovci është mbështetës dhe simpatizant i PDK-së, kjo mund të vërehet në provat bashkëngjitur.

Provë: Fotografi dhe link, mes tjerash, ku dëshmohet përdorimi i gjuhës që nxitë, provokon akt të dhunës apo urrejtjes, në kundërshtim me LZP-në, si dhe në të cilën faktehet si mbështetës i PDK-së:

[https://www.facebook.com/permalink.php?story\\_fbid=3537170856575287&id=100008472212765](https://www.facebook.com/permalink.php?story_fbid=3537170856575287&id=100008472212765)

Në ankesën Anr.315/2025, pretendohet se më datë Më 2 Shkurt 2025, Qendra e Lëvizjes VETËVENDOSJE në Skenderaj ka identifikuar mbështetësin e PDK-së Muhamet Shala i cili më kuadër të posteve të shumta të tij ofenduese dhe nxitëse për urrejtje, në llogarinë e tij në facebook poashtu ka shpërndarë fotografinë dhe videon me tekstin mbi në fotografi/video "Hajnia ka Emër", njëkohësisht me fotografinë e Kryeministrit Albin Kurti, kandidat për Kryeministër në këto zgjedhje si dhe atë të kandidatëve për deputetë nga radhët e LVV, znj Fitore Pacolli si dhe z. Faton Peci. Se Muhamet Shala është mbështetës dhe simpatizant i PDK-së, kjo mund të vërehet në provat bashkëngjitur. Provë: Fotografi dhe link, mes tjerash, ku dëshmohet përdorimi i gjuhës që nxitë, provokon akt të dhunës apo urrejtjes , në kundërshtim me LZP-në, si dhe në të cilën faktohet si mbështetës i PDK-së: <https://www.facebook.com/muhamet.shala.7165/posts/3859661207589104>

-Në ankesën 321/2025, parashtruesi i ankesës pretendon se me datë 02 shkurt 2025, aktivistë të Lëvizjes VETËVENDOSJE! në Prishtinë, gjatë monitorimit të fushatës zgjedhore në rrjetet sociale, ka hasur në përkrahësin e PDK-së, Xh.Morina, që vërtetohet nga prova e bashkëngjitur në tubimin e mbajtur në Malishevë, nga Partia Demokratike e Kosovës, duke shqyer dhe keqpërdorur fotot e kandidatëve tanë: znj. Fitore Pacolli dhe znj. Fjolla Ujkani me çka konsiderojmë se ka nxitur urrejtje ndaj subjekteve në fjalë dhe Lëvizjes VETËVENDOSJE!. Përkundër se video ka marre gjiron e rrjetit social TikTok dhe është shikuar qindra mijëra herë nga përdoruesit, ende PDK nuk është distancuar nga një sjellje e tillë çka e bën edhe më serioze situatën, ku tërthorazi përkrahet kjo sjellje e cila cenon rëndë nenin 34 par 1 nën par 1.11 e cila sanksionon sjelljen nxitëse, provokuese.

Si dëshmi ka bashkëngjitur provë: CD

Përmes këtij veprimi mbështetësit/ simpatizantët e partisë politike PDK dhe subjekti politik PDK kanë shkelur dispozitat e nenit 34. paragrafi 1, pika 1.11 të Ligjit për Zgjedhjet e Përgjithshme në Kosovë.

Në përgjigjen në ankesa të subjektit politik Partia Demokratike e Kosovës theksohet se, para se të trajtojmë meritat e ankesës, e shohim si të rëndësishme për të shqyrtuar çështjen e afatshmërisë së ankesës, pasi që siç mund të vërehet, ankuesi nuk i ka bashkëngjitur si dëshmi asnjë provë me të cilën argumentohet koha në të cilën ka ndodhur shkelja e pretenduar, pasi që në vështrim të provës së bashkëngjitur, dëshmohet vetëm që postimi të jetë shpërndara para disa orësh, mirëpo nuk mund të vërtetohet koha se kur është bërë Screenshoot, andaj si i tillë është e pamundur që të vërtetohet se në cilën kohë ka ndodhur shkelja e pretenduar në ankesë. Gjithsesi, edhe po të konsiderohet i mirëqenë fakti që ankuesi ka parashtruar ankesën në afat, vlerësojmë se ankesat si të tilla janë të pabazuara për arsyet si në vijim: PDK në asnjë mënyrë nuk e konteston faktin se veprimet e personave të cilët janë objekt i kësaj ankese përbëjnë përdorim të gjuhës që nxit ose provokon, ose që mund të nxisë ose provokojë një person tjetër për të kryer një akt të dhunës kundër personave tjerë, për të cilat vlerësojmë se padyshim përbëjnë veprime të ndaluara. Mirëpo, konsiderojmë se ankuesi nuk ka arritur që të argumentoi përgjegjësinë subjektive ndaj

subiektit politik PDK, pasi që siç do të vërej ankuesi me asnië provë nuk ka arritur që të bëj ndërlidhjen e veprimeve të personave të përmendur në ankesë, me përgjegjësinë e subjektit politik PDK, mirëpo është mjaftuar vetëm me pretendimin se të njëjtit janë mbështetës dhe aktivistë të PDK-së. respektivisht nuk ka argumentuar që të njëjtit të jenë pjesë e strukturave të Partisë Demokratike të Kosovës, apo ndonjë lidhje afërsie me këtë subjekt politik.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimit dhe Vendosjes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ankesat e evidentuara me numrat si ne vijim: Anr.301/2025, të datës 01.02.2025, Anr.308, Anr.309, Anr.310 Anr.315/2025, Anr.321/2025, dhe 02.02.2025., janë bashkuar dhe janë trajtuar me një vendim, andaj procedimi i këtyre ankesave evidentohen nën shenjën e përbashkët A.nr.301/2025, për shkak të natyrës së njëjtë të çështjeve të parashtruara nga subjekti i njëjtë politik LVV kundër subjektit të njëjtë politik PDK, si për nga përmbajtja ashtu edhe për nga kërkesat e paraqitura të ankesave.

PZAP-i, pasi që shqyrtoj dhe vlerësoi ankesat gjeti se:

#### **Ankesat janë të bazuara**

Paneli, pas shikimit të shkresave të lëndës të ofruara si provë materiale, ka gjetur se mbështetësit dhe simpatizant të subjektit politik PDK, në kundërshtim me dispozitat ligjore të Ligjit Nr.08/L-228 për Zgjedhjet e Përgjithshme në Kosovë, Mbështetesi Rasim Brahim Rexhepi, ka postuar në llogarinë e tij në rrjetin social Facebook një tekst i cili përmban gjuhë urrejtëse dhe ofenduese *"Mos të harrojm se kjo qeveri në krye më Albin Serbin e ky pushtet na pat detyru më dal në rrug më ja ndalu veprimët idoteske që i bënte kunder vlerave të luftës, e vjedhjeve masive që i bënte kur erdh në pushtet, e për këtë arsye kena me e rrëxu BASHKOHUNI TË GJITHË PER NDER TË ATDHEUT!"*. Mbështetësi i PDK-së Nehat Bunjaku i cili në kuadër të postimeve të shumta të tij ofenduese dhe nxitëse për urrejtje kundrejt LVV-së dhe Kryeministrit Albin Kurti, në llogarinë e tij në facebook ka shpërndarë fotografinë dhe videon me tekstin mbi fotografi/video *"Herio i Albin Kurti dhe Vetevendosjes Oliver Ivanovi"*, më një fotografi përçmuese (*Kurti dhe Ivanovic të përçafuar*), Mbështetesi Demë Berisha i cili përmes fotografisë dhe tekstit të shpërndarë në llogarinë e tij në facebook, ka ofenduar rëndë, ka nxitur gjuhë të urrejtjes ndaj Kryeministrit Kurti, njëkohësisht kandidat i LVV për deputet dhe Kryeministër, ku në tekstin e shpërndarë, shkruan *"O servila e Ilaskuca te vegles serbe Kurtoviqit, Sado që paguheni shtrenjtë, perderisa shiteni, nuk keni asnjë vlere."* Mbështetësin e PDK-së Enver Rubovci në llogarinë e tij në facebook poashtu ka shpërndarë fotografinë dhe videon me tekstin mbi në fotografi/video *"Tradhtia dhe Hajnia kanë Emër.. VETEVENDOSJE bashkë me Albin Kurtin"*, ndersa video poashtu ka tekstin *"LVV-ja është strofull e bashkëpunëtorëve të Serbisë!"*. Mbështetësi i PDK-së Muhamet Shala në llogarinë e tij në facebook ka shpërndarë fotografinë dhe videon me tekstin mbi në fotografi/video *"Hajnia ka Emër"*, njëkohësisht me fotografinë e Kryeministrit Albin Kurti, kandidat për Kryeministër në këto zgjedhje si dhe atë të kandidatëve për deputetë nga radhët e LVV, znj Fitore Pacolli si dhe z. Faton Peci. Mbështetësi i PDK-së, Xh.Morina, që vërtetohet nga prova e bashkangjitur në tubimin e mbajtur në Malishevë, nga Partia Demokratike e

Kosovës, duke shqyer dhe keqpërdorur fotot e kandidatëve të LVV-se Fitore Pacolli dhe Fjolla Ujkani.

Paneli vlerëson se gjuha e përdorur si më lartë nga mbështetësit dhe simpatizuesit e PDK-së është gjuhë denigruese dhe urrejtëse në raport me subjektin politik LVV dhe se përdorimi i një gjuhe të tillë është në kundërshtim me nenin 34 pika 1.11), e LZP-së, me të cilën përcaktohet: *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... 1.11) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”*.

Sipas Panelit përmbajtja e deklarimeve të tilla të konsiderohen gjuhë nxitëse dhe urrejtëse kundrejt subjektit politik LVV, dhe se kjo konsiderohet shkelje e rregullave zgjedhore në Kosovë, nga se deklaratimet e tilla në kohë të fushatës zgjedhore, kanë për qëllim të krijojnë polarizim të elektoratit, të krijojnë atmosferë tensioni ose të nxisë ndjenja të urrejtjes dhe të përçarjes, të acaroj rivalitetin politik. Paneli vlerëson se partitë dhe kandidatët si dhe mbështetësit dhe simpatizuesit e tyre janë të detyruar të respektojnë etikën zgjedhore dhe të shmangin veprime apo deklaratime që mund të sjellin pasiguri, destabilitet apo të përkeqësojnë atmosferën politike në përgjithësi, njëkohësisht janë të obliguar të respektojnë dinjitetin dhe integritetin e të tjerëve. Përdorimi i gjuhës së tillë mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Andaj Paneli gjeti se gjuha e përdorur është në kundërshtim me Kodin e Mirësjelljes për Subjektet Politike, Mbështetësit e tyre dhe Kandidatët gjegjësisht me dispozitat e nenit 34 LZP-së, ku janë të përcaktuara veprimet e ndaluara të subjekteve politike dhe me këto veprime janë shkelur dispozitat e nenit 34 paragrafi 1 nën paragrafi 1.11 të LZP-së.

Sipas Panelit vendosja përdorimi i kësaj gjuhe nga simpatizantët e subjektit politik të PDK-së, në kuadër të fushatës zgjedhore, konsiderohet shkelje e rregullave zgjedhore në Kosovë, ngase veprimet e marra në kohë të fushatës zgjedhore kanë për qëllim të krijojnë një lidhje negative ose të nxisë ndjenja të urrejtjes dhe krijoj atmosferë tensioni dhe përçarjeje. Veprimet i tilla interpretohen si një përpjekje për të manipuluar perceptimin e votuesve, duke përdorur gjuhë fyese, denigruese dhe përçmuese kundër subjektit politik ankues dhe udhëheqësit të saj, dhe se ky veprim shihet si një mënyrë për të përdorur kualifikime të rënda për të stigmatizuar një subjekt politik dhe për të rritur ndjenjat negative kundrejt subjekti ankues. Paneli vlerëson se partitë politike, kandidatët dhe simpatizantët e tyre janë të detyruar të respektojnë etikën zgjedhore dhe të shmangin veprime që mund të sjellin pasiguri apo të përkeqësojnë atmosferën politike. Përdorimi i figurave të tilla të përfolura mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Përdorimi i një gjuhe të tillë, sipas vlerësimit të Panelit është në kundërshtim me nenin 34 paragrafi 1 pika 1.11), e LZP-së, me të cilën përcaktohet *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... 1) përdorimi i gjuhës, në formën e shkruar ose gojore, që nxit ose provokon, ose që mund*

*të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”.*

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimet e tilla përbëjnë përsëritje të shkeljeve për nga natyra, pjesëmarrjen e subjektit në fjalë në zgjedhjet e mëparshme që konsiston në faktin se subjekti politik PDK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore, e poashtu edhe faktin se shkelja është bërë nga ana e simpatizuesve të subjektit politik në këtë rast PDK, e jo nga ana e kandidatëve apo zyrtarëve të saj.

Duke pas parasysh se Rregullorja 01/2024. dhe dispozitat e LZP, neni 120 paragrafi 1 nën paragraf 1.3 për shkelje të tilla parashohin dënimin me gjobe deri në 50.000 euro, Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme si dhe faktin që subjekti politikë në fjalë ka bërë shkelje të natyrës së njëjtë në mënyrë të përsëritur.

Nga arsyet e theksuara me lart, e në kuptim të nenit 34 paragrafi 1 nën paragrafi 1.11), neni 118 paragraf 1 dhe neni 120 paragrafi 1 nën paragrafi 1.3 të LZP-së, vendosi si në dispozitiv të këtij vendimi.

**Paneli Zgjedhor për Ankesa dhe Parashtresa**

Anr.301/2025 më datën 04.02.2025



**Këshilla Juridike:** Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.